



БАЙ-ТАЙГА

Бай-Тайга кожууннун солуну

№7

2019 чылдың
июль 29
понедельник

садар өртээ
дугуржулга ёзугаар



Наадымда-Бай-Тайга

Чылдың эртер Наадым байырлалында тыва өглер кайы ырактан Тол-Булакты улам-на аян-шинчи кирип турар. Бо найырада республиканың шупту кожууннары бөөдей өглерин дерип, тип алгаш, чонга сонуургатканнар. Өг хоорайжыгаштың бажында, хүн үнер аайы-биле эгелээрге, бажы бедик Бай-Тайганың аныяк малчыннары Артыш, Чозармаа Иргиттер кидис өөн тикен. Бо өг-бүле ийи чыл бурунгаар “Аныяк өг-бүлеге-кыштаг” төлевилелиниң боттандырылгазы – биле 200 баш санныг хойну хүлээп алгаш, онча-менди кадарып келген. Ажылынга кызымаккай аныяк малчыннар бо чылын 200 хойну хүлээткеш, боттарының камгалап алганы малын улаштыр кадарып, үре-түңнелдиг болуп, үнелңдеткен. Кидистен бүткен өгнүң ишти-даштын комиссия кежигүннери шинчилеп көргөш, “Тиилекчи өг” деп түңнелди үндүрген, ынчангаш Бай-Тайганың аныяк малчыннары 110 муң рубль-биле шаңнатканнар.

Бо мөөрейде онза бир чүүл болза, өгнүң каас-чаражы, бай-шыраа-даа эвес, өгнүң эт-севи каяа турарыл, ээлери кымнарыл, канчаар эдилеп орарын көөр. Эң кол сорулга, кидистен салганы, шынары, өгнүң ыяжын хол-биле чазааны көрдүнүп турар. Өгнүң ыяжын амгы үениң херекселдерниге чазаарга, ол өг бир, ийи чыл болурга үрелир, а хол-биле шеверлээрге көшкүн чон ону чылдар-биле эдилеп чоруур апаар.

Бистиң кожуунувуста ада өгбелеринден салгап алган өг кылыр мастерлер хөй. Оларның санынга Салчак Артемий, Ендан Эрес-оол, Салчак Николай, Ооржак Виктор, Чанзан Аяс дээш өскелер-даа хамааржыр.

